

Gálatas

‘Ka amøñigueh’ chib pørig

1 ¹Na Pablo Jesucristo nøashib karua ørig, mu móguelø nømuimburab karua ørig kømøwei, mu katøgan inrraincha karua pasrig kømøwein kur. Treeg kømøtø, Jesucristoba, katø Tius Møskai Jesucriston kwailai utugurri øsiirangarubiiba karua ørig kur. ²Namui nunelø mayeelø naba warabeløba Galacia pirausrø iglesiameran i kilgawan na pørar. ³Namui Tius Møskaimba, Señor Jesucristoba nui ka yandø tab indigwan køben, chi isumgaig tab købigwan køben ñimun tranrrun. ⁴Truibe nam kaig mariilaimburab nøashib kwanrrab pasramisrig køn, nam warain kwaløm larrø kaig pasrabigugurri namun wesraig kønrrai, tru namui Tius Møskai maig kønrrain køben, trumay. ⁵Truigwan tørguegwalmabig kønrrun managatig. Treeg kønrrun.

Kaigyugurri wesrab wam katøgan peebe chi kaagøn

⁶ ¡Paare! Kan øyeeg misaamerabe mailø kermab ashar, Tiuswei tabig srø wamwan peemay yunømara srua pønrrønrrab, tru Cristoi ka yandø tab indiitøga ñimun wamabig Tiuswan chabguen yandø yanayutø tarømisrøbguen ambin køben. ⁷Tabig srø wam katøgan peg kuimba kømøtø, møiløgøben ñimune ke ka iløsrkøb, Jesucristoi tabig srø wamwane ke kan mumaygucha kømøig kønrrai mindisha pønsrøg køb indan. ⁸Namdøwein kui lata, kabe kan ángel srømbalasriig kui lata, tru tabig srø wamwan nam ñimun eshkab kusrenani lataig kømøtø, katøgan peemaytø yunømara waminchibiibe, managatig trømbøig nebuig pasrønrrai pasrig købash. ⁹Nam ñimun eshkaigwan, møi katøle katø nabe eshkanrrab inchar: tru ñim uti lataig kømøtø, møikkøben tru tabig srø wamwan yunømara peemaytø eshkab kusrenanøbiibe, managatig trømbøig nebuig pasrønrrai pasrig købash cha.

¹⁰ ¿Nabe misaamera nan tab inchamab lab pasrabrah, kabe Tius tab inchai lab pasrabrah chindah? ¿Kabe misaamera tabzhig inchai lab pasrabra chindah? Pøs na katøgucha misaamera tab kui mørtrai na nømun tabzhig inchib pasrabig kuimbe, trube, nabe Cristoi marøb megabig kømubrsrubrainrrun.

Pablon Tius martrai karua pasrig

¹¹Iigwan ñim, nai nunelan, wammørøsrkönrrab inchar, tru tabig srø wamwan na eshkab kusrenaniibe möguelø nømdø isua wesruigwan wamindikkucha kómøn. ¹²Pøs nabe, kan mówan utig kómøwei, katø kan móg kusrenanig kómøwein kur. Treeg kómøtø, nan Jesucristo ashchaj kenamaren, treeg utig kóbig kón.

¹³Kaguende ñimbe manawei nane wammørøbelø kuinrrun, judíosmera Tiusweyasig maig marameløyu, na trunun marøb uñib uras na merrabsrø maig inchib uñibig kuigwan: kan namig kóbiitø ¡katø! chindinrrabna kui inchib, Tiuswei iglesian kaig martrab wendautø llirab, nóm tru treeg marøb tøgagúigwan kerriguwan pinishinrrab truba truba inchib unig kóbigwan. ¹⁴Namui misag utu, naba ketøtø nørøråwarwei utu móilan kóben nabe kanab kusrebig kóbig kur, judíosmera Tiusweyasig maig marameløyube, kaguende nabe merrabsrø namui kólli misaamerma maig marøb amrruigwane maikken purøbuniimiig könrrai inchibig kóbig kua. ¹⁵Inchendø Tiusbe nane nai usrai patsø umbu wabenbatørsøwei nane tarømara, nui ka yandø tab indiitøgatø nane wamig kón. Incha nun tabig asønaben, ¹⁶nui Nusrkawan na nebua ashchaj kenamarig kón, judíos kómø misaamerai utu nuimburabigwan na eshkab kusrenanamig könrrai. Inchen nabe tru urastø mu mówan paya mórmøwei, ¹⁷katø naguen treeg kómøwatø Cristo nøashib karua øriilan payrrab Jerusalénsrømay nebimøwei indig kón. Treeg inchimøtø, Arabia pirausrømay ya, trugurrimbe katøle Damascosrømay arrig kóbig kón.

Jesucristo nøashib karua øriilø katøganeløba

Pablo lincha waminchib

¹⁸Indiibe yandø pøn pila puraiben, Jerusalénsrø nabe Pedroba waminchab ya, trusrø nøba parru kørrømisrøbig kur. ¹⁹Cristo nøashib karua øriilan nabe trusrømbe möigwangucha ashmur. Ashippe, Señorwei nuneg Jacobondø ashar. ²⁰Na ñimun pøriibe, Tiuswei merrab isa kómøtø, treeg kón cha, treeg pørar.

²¹Incha trugurrimbe Siria pirausrømayba, Cilicia pirausrømayba ibig kur. ²²Nane Judea pirausrø Cristoi iglesiamerabe malauguebe ashmeelø srø kóbig kón. ²³Truilløbe øyeegwandøwei wammørøbelø kón: “Tru merrabsrø namun kaig marøb llirab uñibig kóbiibe, móimbe tru Jesucristoi tabig srø wamwan eshkab kusrenanøb unan taig, tru merrabsrømbe nø pinishinrrab inchib unig kóbigwan.” ²⁴Incha nagurri Tiuswan truba tabig waminchibelø kón.

Cristo nøashib karua øriilø Pablon chi chimø ka utab

2 ¹Indiibe yandø catorce años misren, katø Jerusalénmay Bernabéba ibig kur, katø Titongucha tøgatø pera. ²Inchendø nabe trusrømay ippe, Tius nan trusrømay inrrai nan kenamaren, nabe treekkurri yaig kón. Incha

tru Tiuswei tabig srø wamwan judíos kómø misaameran na mandø eshkab kusrenanøb unigwan nömun eshkabig kur. Nabe truigwan marøppe, tru tabelø kui asha tøgagúig nørreeløba, namdø nøørø tulundzuna trunun wamindig kón, na tru møi marøb pasraigwanba, na tru marøb unig købigwanba, ka treeg marøb uniitø puraimørrai.³ Inchendø na pera yaig Titon kóbenguen griego kuingucha, nune circuncidaweig kónrrai inchimuig kón. ⁴ Tru treegwan martrai inchibeløbe ka isatø Cristogurri namui nunelø chib isabelø sölwan kómø, peemaytø kusrenanøbelø, ashmøwatø nilø kegørrin købig kón, nam Cristogurri chi iløsrkaiimeelø melaigwan maig inchibelø kótashchab larønrrab, katøle truyutøwei kegørra melønrrai martrab.⁵ Inchen nambe nóm chi tailan ni kan petøzhiitøguen alrranmeelø ker, Tiuswei tabig srø wam newan ciertonii ñimui utu maig kóbiibe treeg pasrabig pasrønrrai.

⁶ Tru tabelø kui asha tøgagúig, tru nørreeløbe, nane øyeeg martrig cha, srøibe chigucha eshkawa pasrmuig kón. Tru truilaimburappe, nóm nørreelø kuigwane naimburappe trunun isua ashib pasramibe chigaagøn. Pøs Tiusbe muingatøgucha pasrømig kón. ⁷ Masken treeg inchibgunrriibe Tiuswei tru tabig srø wamwan judíos kómø misaamera, tru circuncidameelan na eshkab waminchib unamig kónrrai, nan trana pasrig kuin kui ashibelø kón, judíosmera circuncidawarwan kusrenanøb waminchib uñchai Pedron pasrig kób lataitøweingue. ⁸ Pedron tru judíos misaamerayasig Jesucristo nøashib karua ørig kónrrai, tru nø marøb uniiløyu marøb pasrab Tiustøwei na marøb uniiløyugucha marøb pasraig kón, tru judíos kómø misaamerayasig Cristo nøashib karua ørig kónrrai. ⁹ Nan øyeeg kónrrai tranig kuin kui nebua ashabe, Jacoboba, Pedroba, Juanba tru tabelø kui asiilø, kan pilarmera latailø kui asha tøgagúiløbe, nanba, Bernabéwanba kusrmay tasigwan tranøbelø kón, yandø møimbe lata lincha marøb amøñibelø kónrrab cha, treeg kenamarøb, nambe judíos kómø misaameraisrømay amben, nømbe judíosmera circuncidailaimay ambamig kónrrai. ¹⁰ Namune eshkappe, waachameraimburab pesannamø isua kónrrai, trunundø eshkabelø kón. Pøs nabe trununwei truba truba isua marøb megabig kur.

Pablo Antioquíasrø Pedron ‘kalø marin kón’ cha namab

¹¹ Inchendø wendø Antioquia ciudasrø Pedro puben, nabe nun malaugue ‘øyeebe maig margu’ chib truba mur namabig kur, kaguende nø treeg mariibe, pella marøb pasraig kóben. ¹² Kaguende Jacobo karua øriilø møiløgøsrøn amrrumøwatøbe, judíos kómø misaameraba ka lincha mab uñabe, truilø yandø pubene, trube, nøørøtø inchib, yandø linchimub kebibig kón, tru judíos kómø misaamera korebelane, trube, circuncidamig kón chib, treeg inchib sötømeran kørig kóptø. ¹³ Inchen Jesucriston korewa pønrrabelø katøgan judíosmeragucha, Pedro tru kalø marøb pasraigutøwei marøb kebamben, tru nømguen treeg marmubendø, treeg marøbelø misrøb pønrraigu Bernabéguen tøga kebeña pasrabig kón. ¹⁴ Inchawei Tiuswei tru

tabig srø wam newan ciertonig maig køben treegwan sølgandø amøñimuin kui ashabe, nabe mayeelai merrab Pedrone trenchibig kur: “Ni ya judíoguen yandø kan judío kømíig lataig marøb uña, ¿judíos kømø misaamerane, trube, ñigan judíosmera latailø kørnrai martrab inchib pasrøtirru?” cha.

**Isubigwan Jesucristo pasra tøgagúikkurri
kaigyugurri webambamigwan tøgagøb**

¹⁵Nambe kal-lainukkurri trendø judíos misaamerá ker, judíos kømø misaamerá kaig marøbelø kømøtø. ¹⁶Inchendø nambe ashibelø ker, tru maig maramigwan martrai Moisés pørig truig maig karuilan treeg mara, ni kan muguen chi kaig kømíig lataig tabig kørømartrab kaimaigwan. Treeg kømøtø, isubigwan Jesucristoinuutø pasrøkcurri, treeg køn. Namgucha Cristo Jesúswan koreig køn, isubigwan Cristoinug pasra tøgagúikkurri chigucha chi kaig kømeelø lataig kørømarig kørnraab, tru maig maramigwan martrai Moisés pørig maig martrain chibig køben trunun mara kømøtø. Kaguende tru maig maramigwan pørig, truig maig chibig køben treelan mariitøgabe, muguen chi kaig kømíig kui lataig tabig kørømarig kørnraamøn.

¹⁷Pøs nambe Cristogurri chigucha chi kaig marmøwa lataig kørnraab inchib meløben, trube, moi Cristoinuube katø nambe kaig marøbelø kuin kui treeg puptinchene, trube, ¿Cristobe kaig martrainguen inchib pasrabig køn ta chindah? ¡Kah! mumaygucha chi treeg kørnraamøn. ¹⁸Tru maig maramigwan martrai Moisés pørig maig chibig køben trunun na mas treeg marøb pasrømønrrab pinishib patsøgaigwan, katøle trunundøwei kusrúa pasrøb kebyabe, tru na treeg marmønrrab cha wamindigwane natøwei itøbunab pasraig webinrrun. ¹⁹Tru maig maramigwan martrai Moisés pøriibe yandø nane chi martrabgaikkurri truigweimburappe yandø nabe kwaig lataig kur, na Tiusweyasig øsig pasrønrrab. ²⁰Kaguende nabe Cristoba kegøtø kurusyu mesraig lataig kuig køn. Incha møimbe nabe yube naimburab naasiitø øsig uñmøtø, Cristo nainug pasran. Moi ya na øsig uniibe, Tiuswei Nusrkaweinug isubigwan pasrøkcurri øsig pasrar, nøbe nan undaarawa, nøashib nayasig kwaig køn. ²¹Nabe Tiuswei ka yandø tab indigwane kashmur. Kaguende tru maig maramigwan martrai Moisés pørig maig taigwan treeg mariitøga, chi kaig kømíig lataig tabig pasrønrrab indamig kuig kuimbe, trube, Cristo kwaibe ka kwag køptø kwaig lataig webibruinrrun.

**Isubigwan Jesucristoinuutø pasra pønrraiba,
maig maramigwan martrai Moisés pøriiba**

3 ¹¡Nim Gálatasméra larrø chugúi mørømø misaamerá! ¿Nimune øyeetø mumaygucha wegønønrraingaig lataig melønrraimbe ñimune murre may sòtiicha pønsrøta? Jesucristone tru kurusyu mesraig køn cha, ñimun ke tab asha kørnrai kusrennøb wamindigwan øyeeg martraimbe. ²Nabe ñimuimburab chi mas kømøtø, iigwandøh wammørinrrabna køtan: ¡Tru

maig maramigwan martrai Moisés pørig maig chibig køben treegwan mara, Espíritu Santon utig koh, kabe isubigwan Cristoinuutø pasra, tru tabig srø wamwan mørikkurrin kø chindah? cha. ³ Kan ñim kui, larrø chugúi mørnmø misaamerá! Espíritu Santotøga marøb pølbasra, ñtube, møimbe chu punrrab indamigwane ka ñimuimburab ka ñim mariiløtøgatø punrrab inchib kòtirru? ⁴ Ñim chinetø chinetø maig kuig mørøb puraambiibe, trube, chiweingucha chi purugumuig kørnrab kø chindah? Pøs purugubwei indig kuinrrun. ⁵ Kabe Tiusbe nui Espíritun ñimun tranøb, katø tru maramburab mariilan ñimui utu marøppe, tru maig maramigwan martrai pørig, truig maig chibig køben trunun ñim marikkurri treeg mara chindah? Kabe tru tabig srø wamwan ñim møra koreikkurrin kø chindah?

**Abraham nui isubigwan Tiusweinug pasrikkurri
Tiusbe nune kaig kómig lataig tabig kui asig**

⁶ Abrahamma Tiuswan øyeetøwei køreben, nune chi kaig kómig lataig tabig korrømarig købig køn. ⁷ Inchawei isua asamig køn, isubigwan Tiusweinug pønsrøbeløbe si, Abrahamwei ureemera kuin kui. ⁸ Inchawei Tiuswei wamwan pørigube manasrøwei trendaig købig køn: Isubigwan Tiusweinuutø pasrikkurri judíos kómø misaamerangucha chi kaig kómeelø lataig tabig korrømariilø kørnrain cha. Tiusbe kanmaytø nui tru tabig srø wamwane Abrahamwan eshkaig købig køn, øyah chib: “Judíos kómø misaamerá chu pirausreelandøgucha ñigurri mayanguen tab indiilø kørnrun” cha. ⁹ Inchawei kørebeløbe tru Abraham Tiuswan køreb møøba kanbalatø mayanguen tab indiilø køn.

¹⁰ Kaguende mayeeløba tru maig maramigwan martrai Moisés pørig, truig maig chibig køben treeg mariitøga trumay kaigyugurri webamrrab inchibeløbe, trømbøig nebuig pønrrønrrai pønsrailø køn. Kaguende treeg pørig pasran: “Mundøgucha trømbøig nebuig pønrrønrrai pønsrailø kørnrun cha, tru maig maramigwan martrai pørin kilgayu maig taigwan marøbig marmeelane.” ¹¹ Inchawei tru maig maramigwan martrai pørig maig chibig køben, treeg mara, Tiuswei merrappe, chi kaig kómeelø lataig muguen tabig korrømisrmuig kuin kui tørgandø asamdiig køn. Kaguende: “Sølgandø tabig uñibiibe isubigwan Tiusweinuutø pasra tøgagúikkurri øsig uñchun.” ¹² Inchen tru maig maramigwan martrai pøriibe, tru isubigwan Tiusweinuutø pasra pønrraigugurri arrumiig køn. Treeg kómøtø, tru maig maramigwan pøriibe trenchibig køn: “Truig maig karuilan marabe, treeg mariiløtøga øsig uñchun” cha.

¹³ Cristobe nø namun pena, kaigyugurri wesruig køn, tru maig maramigwan martrai pørig namun trømbøig nebuig pønrrønrrai indigugurri, tru nø namuimburab nøashib larrø trømbøig nebuig pasramisra. Kaguende Tiuswei wamwan pøriibe trenchibig køn: “Mutøgucha kan tusryu mesra kweetsinabiibe larrø kaig kui asig kørnrun” cha. ¹⁴ Øyeeg marøppe, Abrahamwan tru

mayanguen tabigwan tranig kóbiibe Cristo Jesúskurri tru judíos kómø misaameran tøga nebunrrai indig kuig kón, isubigwan Jesucristoinuutø pasra, Espíritu Santon trannrrab kórrømisrig kóbigwan nam utamig kónrrai.

Maig maramigwan martrai pøriiba, Tius trannrrab misriiba

¹⁵Nai nunelø, móimbe misag maig waminchibelø kóben nabe trumay isua waminchab inchar: ‘Øyeeg marig kórrømisrtrai treeg martrab’ cha, kan móg wamindigwan kóbenguen yandø treeg marig kórrømisrtrai pøra kórrømarigwane, utsøgutsamig kómøwei, kabe srøitø nemaramig kómøwein kón. ¹⁶Inchawei Tiusbe Abrahamwan ‘øyeeg marig kórrømisrtrai treeg martrab’ cha kórrømisriilane Abrahamweinukkurri arrub misagwein kónrrai tøga trencha pasrig kón. Nui wambe: “misaamera srøig srøig kurrab amrrubelø” chimíig kón, purø nørrø kui lataig. Treeg chimøtø: “ñuinukkurri kandøzhiitø arrub misagwein” taig kón, truibe Criston. ¹⁷Inchawei nabe trenchinrrab inchar: Tius Abrahamwan manasröwei tru nuinukkurri acuerdon treeg martrab cha kandø isua nø kórrømisrigwane, tru maig maramigwan martrai Moisés pørig 430 años puraiben wendau arrubiibe, treeg marig kórrømisrmønrrai martrab kaimanrrun cha, Tius tru øyeeg martrab cha kórrømisrigwan treeg marmuig kui lataig mara kórrømartrab. ¹⁸Inchawei tru namun keta tranamig tøgagúigwan tru maig maramigwan martrai pørig truikkurri utamig kónrrab kui kuimbe, trube, tru ketig utamigwane tru ‘tranrrumøn’ cha kórrømisrikkurri utamig kómublsruinrrun. Inchendø Abrahamwane Tiusbe keta tranamig tøgagúigwan ka yandø keta tranig kóbig kón, tru ‘tranrrumøn’ cha kórrømisrig truikkurri.

¹⁹Trube, treeg kóbene ¿tru maig maramigwan martrai Moisés pøriibe chindamigweyasig kerah? Pøs trunune tranøppe, tru kalø marigwan chigúi neuba ashchai treekkurri tranig kóbig kón, tru ‘tranrrumøn’ cha kórrømisrig, tru Abrahamweinukkurri arrubig arrumnegatig truigwan marøb kómig kónrrai. Inchen tru maig maramigwan martrai pørigwane Tiusbe ángelesmeragurri kan móg katøganelayasis purøwaminchabigwan trannrrai tranig kón. ²⁰Inchawei Tiusbe Abrahamwan tru ‘treeg martrab’ cha wamincha kórrømisrøppe mu katøgan purøwaminchabig palain kómøtø marig kón, pøs Tiusbe nøtø kandø kua.

Tru maig maramigwan martrai pørigwan Cristobe patsøgøb

²¹Trube, treeg kóbene, ¿tru maig maramigwan martrai pøriibe, Tius tru ‘treeg martrab’ cha kórrømisriilane treeg marmuig kuig lataig, kabe søtø pasramisrøb nørøtø kutchab inda chindah? ¡Mumaygucha chi treeg kónrraamøn! Pøs maig maramigwan martrai tøgagúig, tru øsig kómigwan trannrraptiig kuig kuimbe, trube, tru sølgandø tabig mariibe tru maig maramigwan martrai pørikurrin kóbsruinrrun. ²²Inchen Tiuswei wamwan pøriibe trenchibig kón, maya misaamerabe kaig

maramigutø melónrrai merrarrawa tøgagúilø kön cha, tru isubigwan Jesucristoinuutø pasra pönrraikkurri Tius tru trannrrab misrigwan nun korebelane tranamig könrrai.

²³Inchen tru isubigwan Jesucristoinug pasra tøgagømig arrumøwatøbe, tru maig maramigwan martrai pøriibe namune nø merrarrawa tøga pasrabig kön, isubigwan Jesucristoinuutø pasra pönrramigwan ashchai kenamariilø kømnegatig wegønømø pönrrønrrai. ²⁴Inchawei tru maig maramigwan martrai pøriibe namune Cristoinug pegutchab nø pereb pasrabig lataig kuig kön, isubigwan Jesucristoinuutø pasra tøgagúikkurri nam chi kaig marmeelø lataig tabig kørrømisra pönrramig könrrai.

²⁵Trune møimbe yandø tru isubigwan Jesucristoinuutø pasra tøgagømig puikkurrimbe peguchib pera lliraindeelø melømer. ²⁶Inchawei isubigwan Cristo Jesúsweinug pasra tøgagúikkurrimbe ñimbe mayeeløba Tiuswei ureemera kön. ²⁷Incha Cristoba kanbalatø misrtrab mayeeløba ñim piu umbu ulsrailøbe, yandø Cristotøga pinøbuliilø misrin kön. ²⁸Møimbe yandø ‘judío kön’ tamig kawei, ‘griego kön’ tamig kawei, ‘karuindiig megabig kön’ tamig kawei, ‘mu karuimíig nuimburab uñibig kön’ tamig kawei, ‘møg kön’ tamig kawei, ‘ishug kön’ tamig kawein kön. Kaguende Cristo Jesúsba kanbalatø pönrraikkurri ñimbe mayeeløba kandø kön. ²⁹Incha ñimbe Cristoielø kuikkurrimbe, yandø ñimbe tru Abrahamweinukkurri amrrub misaameria kön, Tius tru keta trannrrab misrig truig maig köben treeg ketig utønrrabelø.

**Møimbe karua srua kuundiig melabelø kømøtø,
yandø nusrkalø ker**

4 ¹Incha nabe trenchinrrab inchar: Kan yauma, tru chi købigwan ketig utønrrab unø lamíig srøbatøbe, kan karuindiig megabig maig köben, treetøwein kön cha, tru chigurrimbunø købigwan puaibe nøwein købendø. ²Masken treeg kømøtø, tru unøbe nøm ømilø ashib pera kørnrrab kørrømisrøbeløba, katø tru unaimburab chi købigwan nøm ashib kørnrrab pönrramisrøbeløba truilø ashib pera kuundiig kön, mørskai tru maya yanagatig treeg kørnrrain cha pasrig truig nebumnegatikke. ³Inchawei namungucha treetøwei, nam ureemera latailø srø köbenbatøbe, yu pirø muba kuimburab mandø isua marøb kømøtø tøgagúilø truig nø merrarrawa tøgagúig melabelø købig ker. ⁴Inchen ke yandø treeg maramig pubene, Tiusbe nui Nusrkawan ørig købig kön, ishug misagweinug kal-laweig, tru maig maramigwan martrai Moisés ørig maig chibig köben treegwan marøb megabig. ⁵Tru maig maramigwan martrai ørig maig martrain karuben, treegwan marøb melabelan, namun pena wesranrrai ørig kön, nam nui trendø trag ureemera latailø kømøtø utamig könrrai. ⁶Incha yandø mørskai tru tøgagúilø tøgagúig melabelø købig ker. Inchen Nusrkawei Espíritu namui manrrømerayu pasrønrrai ørig kön. Inchen

tru Espíritu Santobe truba truba miabig kón: "Abba, nai Møskain" chib.
 7 Inchawei treeg kóbene, møimbe yandø ñibe karuindiig megabig kómotø,
 nusrkain kón, trube, yandø nusrkai misra kórromisrikurrimbe, tru keta
 tranamigwangucha utonrrabig kónrrai marig kón Tiusbe.

**Tru maig maramigwan pørig ke truig srua
 ambiilø melømønrrai wamindiilø**

8 Pøs ñimbe Tiuswan nebua ashmeelø kób uras merrabsrømbe chi cierton tiusmera kómeelan karuindiig melabelø kóbig kón. 9 Trune møimbe yandø ñim Tiuswan nebua ashen, kabe Tius ñimun yandø mumera kui asiilø kuig kóppé, trube ¿yu pirø muba kuimburab mandø isua marøb kómg tøgagúilø truig nø merrarrawa pasrabigwan katøle truigwan chinchab marøb kebamgue? Yeeg chiweingucha chi purugunrrabgaig, kaizheeløyu, ¿ñimungan katøle truilandøwei marøb melag kuitarru? 10 Ñimbe katøgucha mø kwalømmerawane øyeeg marmumig kón chib, i pølmerawane iigwan maramig kón chib, øyeeg pølmera arrubene, øyeelan maramig kóbig kón chib, i pilamera pubene, iilan maramig kón chib, ñimbe treeg inchibelø kón. 11 Nane ñimuimburab truba kórig isutan, na ñimuimburab tab kónrrai marøb megaibe, ke ka treeg marøb megaitø purainrrab kó chindermab isua.

Nun chitø purayailø

12 Nai nunelø, tiusmanda na lataitøwein kórrunrrigay chinrrab inchar, nama ñim lataitøwein kónrrab pasramisrig kóbene. Pøs ñimbe nane chigucha chi kaibe marmuig kón. 13 Pøs ñimbe ashibelø kón, na srøsrøwan Tiuswei tabig srø wamwan ñimun eshkab kusrenanøb uras nai asru kwanrrøbe Tiuswei wamwan wamindig kónrrai treeg puig kóbigwan. 14 Inchen nai asru tru treeg kwanrrøbe ñimune ke chindashig kób lataig indingucha, ñimbe nane køsøn kui inchimøwei, kashmøwei indig kón, masken ñimbe treeg inchimøtø, nane kan Tiuswei ángel kui lataig, kabe Cristo Jesús kui lataig utig kóbig kón. 15 ¿Tru ñim treeg tabig kasrag kóbig tøgagúig kóbigwane, møimbe chu chincha pønrrøgue? Pøs nabe ñimuimburab treeg tamig tøgagur: ke ñimbe ñimui kabmeranguen wesrua, nan tranamidiig kuimbe tranømmørø inchibelø kóbig kuig kón cha. 16 Maig kóbig kuigwan na waminchib pasrappe, ¿kabe na ñimun tsalø kób ashig kómui inchibig misrarre inchib pasrabra chindah?

17 Tru kusrenanøbelø katøganeløbe ñimune nømui marøg kób ke chinsraatø inchibelø kón, chi tabig isua kómotø. Masken ñimune namuinukurri nøørø misrtrai inchib kón, ñim nømuingatø misra nømun ke chinsraatø inchib pønrrønrai isua. 18 Pøs tab kónrraimab isua, chu uraskucha ke chinsraatø inchib isub pønrramibe tabigwein kón, na ñimui utu uñendø kómotø. 19 Nai ureezheelø, kan ishuumisag unø tammisrtrab

pusrkwai inchib lataitøwei, katøle pusrkwai isuim pasrar, Cristo ñimuinug ke newan tab pasramisramnegatig.²⁰ Kan möiwei nane ñimui utu pasrammørø kótan, øyeeg murtø waminchimøtø, peemay waminchab. Pøs nane ñimuimburab ni chi isumgúinguen møramgaig kótan.

Agarwanba, Saranba kemesra wamindig

²¹ Tru maig maramigwan martrai pørig maig chibig kóben ñim treegwan marøb melag kui inchibeløbe, trube, ¿tru martrai Moisés pøriibe maig chibig kui ashmeelø kó chindah?²²Kaguende Abrahambe pagatø nusrkalø tøgagúig kón chibig pørig pasran Moisés pørigu: kan nusrkaimbe tru karuindiig megab ishuwein kóbene, kane mu karuimíig megab ishuwei nusrkai.²³Inchen tru karuindiig megabigwei unøbe, mutøgucha maig tøgagøbelø kóben treeg kal-laig tøgagúig unø kóben, trune tru mu karuimíig megabig tru srawei unøbe, Tius ‘treeg tranrrumøn’ cha korrømisrig kóbig kua treeg kal-laig kóbig kón.²⁴Iig tru øyeelø purayaibe ‘øyeeg lataig kón’ cha eshkabig kón: Tru i pagatø ishumburmerabe Tiuskurri pabalø acuerdo marigwan trunun eshkabig kón: Agar tru ureemera karua srua kuindiig melabelø kónrrai tøgagøb ishuube Tius tru Sinaí Tunsrø nø øyeeg martrab cha kandø isua korrømisrig, truig kón.²⁵Kaguende Agarbe Arabia pirausrø Sinaí Tunyu maig purayaigwan eshkabig kua, tru møin kwaløm Jerusalénwan eshkabig kón, trube truyu nui ureebañau karua srua kuindiig megabigwan.²⁶Trune tru Jerusalén srømbalasriig tru namui usrimbe, mu karua srua kuig kómøtø kón.²⁷Kaguende øyeeg chibig pørig pasran:

“Ureg tøgagørrab kaimab ishug,
managuen ureg tøgagømíibe,
truba tab kui mørøb kasraarab trashi cha,
unø tammisrtrab pusrkwabigwan ñi mana maig kui mørmiíibe.
Kaguende kan ishug nundø elatsigwei ureebe mas nu kón,
keg tøga ishuwei lataguen kómø.”

²⁸Trube, møimbe nai nunelø, Isaac latawei ñimgucha Tius ‘treeg tranrrumøn’ cha korrømisrig tru ureemera kón.²⁹Inchendø tru urassrøma mutøgucha maig tøgagøbelø kóben treeg kal-lab unøbe Espíritu Santo maig kónrrain kóben treeg kal-lab unane ashig kómui inchib kaig martrabgøba inchibig kón. Møingucha treetøwein kón.³⁰Inchendø ¿Tiuswei wamwan pøriibe mandø chibig kóh? “Karuindiig megab ishuwane unanbañau weguchi chibig kón. Kaguende tru karuindiig megab ishuwei nusrkaimbe, tru mu karuimíig megab ishuwei nusrkawan chi kóbigwan keta tranamigwan tøgatø utamibe managuen chi kaanrrun” cha.³¹Inchawei, nai nunelø, nambe tru karuindiig megab ishuwei ureemera kómøtø, tru mu karuimíig megab ishuwei ureemera ker.

Cristo chigucha iløsrkaimeelø könrrai marigu wemallmø pønrramig køn

5 ¹Cristo namun chigucha iløsrkaimeelø könrrai mara, treegu pønrrønrrai pønsraigugurri mur pønrray. Katø tru maig maramigwan martrai pørig, truig maig karuben trunun martrab kebamba, truyutø srua kuindiig melønrrab kømøtø.

² ¡Au ñimguen mørtrai! Na Pablobe ñimumun trenchar: Ñim asru circuncidarramaysruandøbe, trube, Cristobe ñimune chiweingucha chi purugumiig kui lataig webiblsruinrrun cha. ³Nabe katøle maig tamigwan katø trendamønrrun: Møikkøben circuncidarramabiibe, trube, tru maig maramigwan martrai Moisés pørig maig karuigwan kanguen pinab marmø, kerriguwan martrai indig könrrun cha. ⁴Tru maig maramigwan martrai Moisés pørig maig karuigwan ñim treeg mara, chi kaig kømeelø lataig tabig kørrømistrab inchibeløbe, Cristoinukkurri tarømisrøb, katø Tius ka yandø tab indiitøga pønrramigugurrimbe tarømisramba indin køn. ⁵Kaguende nambe isubigwan Cristoinuutø pasra truba muniirab meler, Espíritu Santogurri chi kaig kømeelø lataig tabig kørrømariilø kømigwan muniirab. ⁶Kaguende nam Cristo Jesúsba pønraikkurrimbe circuncidaweig kui chi könrrab kømøwei, circuncidamíig kui chi könrrab kømøwein køn. Treeg kømøtø, isubigwan Cristoinuutø pasra undag købiitøga marøb pønrraig treeg mariibe tabig køn.

⁷ Ñimbe yamba tsabøtø tab ambub melaigwan, ¿tru newan ciertonig maig taigwan ñim mørøb melømønrraimbe, ñimune murre iløsrkøb søtø pønrramisrta? ⁸Øyeeg maramne inchib pasrabiibe, tru ñimumun wamabigweinukkurri arrumíig køn. ⁹Pøs: “Levaduran kan lamøzhig pusriitø harinawan maya somarimba kerrigu larrøbig køn.” ¹⁰Nabe Señortøgabø ñimuimburab chi isumø pasrar, na maig isubig køben ñimgucha treetøwei isunrrab kui. Inchen ñimumun øyeeg punrrai marøbigwane mu kuindøgucha møra meganrrai marig könrrun.

¹¹ Nai nunelø, naimburamma na katøgucha circuncidamig køn chib eshkab kusrennøb unimbe, ¿trube, nane kaig martrab lliramubsruinrrun? Pøs na treeg inchib uñibig kuimbe, trube, tru Cristo kurusu kwaigwan wamindiibe nømune yandø chi iløsrkøb namishimubsruinrrun. ¹²Ñimumun asrwan circuncidangarub, iløsrkøb søtø pønrramisrøb llirabelane, nømundøweinguen kanmaytø kapainguen køn.

Asr maig marøg kui mariiløba, Espíritu Santogurri mariiløba

¹³ Nai nunelan, ñimumun wamappe, ñimbe chiyugucha iløsrka melønrrain kømøtø wamig køn. Inchendø tru ñim chigucha chi iløsrkaimeelø kømig tøgagúigwane, treelø ker chiptø tru kemesra, ñimui asr maig marøg kui inchen trømbøig maramigweyasig tøgagømumig køn. Masken treeg inchimøtø, undag købiitøga kanikkurri kanikkurri mara tranay.

¹⁴Kaguende tru maig maramigwan martrai Moisés kerrigu pøriibe iigwan martrai karua pasrigu chishtø tøga pasran: “Ñui mendaigwan ñiasi lataitøwei undaarau” cha, trendaigu. ¹⁵Inchen ñim namig købiitø kanikkurri kanikkurri lasruyab ke chab mab lataig inchib amøñabe, ñimbe kangurrin kangurri yandø chab pinammay inchib amøñinrrun.

Tiuswei Espíritu maig kørnrrain køben amønaig

¹⁶Inchawei nabe ñimun trendamønrrun: Espíritu Santo maig martrain køben trunun marøb amønay cha, trumaybe ñimui asr maig marøg kui inchen, treegwan marmelø kørnrrabguen. ¹⁷Kaguende asr maig marøg kui inchen kaig marøg købiibe Espírituimburabigwane chi marbashmø katøben, katø Espíritube asr kaig marøg kui inchen marbashmø katan. Inchawei møikkurrindøgucha søtø pønrramisrøb marbashmø katab pønrran, ñimun maig marøg køben treeg marmønrrai. ¹⁸Trune tru Espíritu Santo maig martrai isunanen treegwan marøb meløwabe, tru maig maramigwan martrai pørig truig karuig kømøtø marøb melønrrun.

¹⁹Inchawei asr maig marøg kui inchen treeg mariiløbe tørgandø asamdiig øyeelø køn: mögueløba, ishumburmeraba trømbøig mariilø, køsøngønraptiig mariilø, maramburab trømbøig mariilø, ²⁰chiwan køben kan tius kui lataig mara tøgagúilø, misag purrønna kwaimandzigweimburabelan mariilø, ashig kømui inchib tsalø asiyailø, kwayam lailø, naiwan katøgan kerranrraitamab isub pusrwai asiilø, namig købiitø ke kan chinchimmørø indiilø, chiyutøgucha ke na pasrainrrabna kui isub indiilø, nøørø katøgan sotømisrøb tarømisrøb ambiilø, kanuingatøtø inchib trugatø misrøb ambiilø, ²¹møikkøben chigøben tøgagøben pusrwai asiilø, mutsiirab indiilø, mabgucha maya mag køben mamburab maig øyeelø køn. Katøgan øyeeg latailan nabe ñimun treeg marøb kømønrrai kanmaytø waminchar, marigwansø waminchib lataitøwei. Inchen øyeelan marøbeløbe Tius nø ashib karub waigwan utamibe chi kaanrrun.

²²Trune tru Espíritu Santoinukkurri arrubiibe øyeeg køn: undag købig tøgagømig, kasraatø unamig, chi isumø tab unamig, chine arringucha tammay ka megamig, maig købash inchimø purø tammayig kømig, larrø tab inchibig kømig, maikkucha tarømisrmø megamig, ²³chish inchimøig, tammayig kømig, asr mumay srua itanmaptø kømø isua møra uñibig kømig. Øyeeg mariilan ‘kalø køn’ chinrrabiibe wesrua pasrig chi kaagøn. ²⁴Kaguende Cristo Jesúsweyeløbe tru trendø kaigwan tøga kal-laig asrwane chine kaig marøg købig arrubigwanba, katø treetø treetø kaig marøg købigwanbañau marmønrrab elachar køn, tru kurusu tøgatø mesrøb lataig. ²⁵Inchen møimbe nam Espíritu Santogurri øsig amøñibeløbe, trube, Espíritu Santo namun maig amøñinrrain køben treegwan amøñigun.

²⁶Purø nørreelø misrøb ka isaba inchibelø kømugun, kangurrin kangurri namisiyab, kanikkurri kanikkurri chigurrin køben ka pusrwai asiyab.

Kangurrin kangurri puruguyamig

6 ¹Nai nunelø, inchippa møikkøben chiyugøben kaig mara kebeñia megabene, Espíritu Santo maig maringaruben ñim treeg pønrrabeløbe, katøle treetøwei tab pasramisrtraí maig købash inchimø, tammay puruguy. Inchendø ñiasiitøwei ashiptø mar, ñigucha treegutøwei kebeñib megamønrrappe. ²Chinetø puig meløben kangurrin kangurri lata kuñam puruguyamig køn. Treeg marabe, Cristo maig martrai karua pasrigwan ñimbe marøb kørnrrabguen.

³Kaguende møikkøben truburab kømøig købendø, truba truba nuig kurmob inchibbiibe, chi treeg kømubendø incha, nøtøwei ka kebeñib pasran. ⁴Inchawei ñim móitøgucha chi marigwan ñiimburabigwan søl køtashchab tab isua asamig køn, trumaybe ñibe ñiasiitø tab kui mørøb pasramig kørnrrun, na marigwanba, katøgan marigwanba, maig køtashchab ashib pasramig kømøtø. ⁵Kaguende móitøgucha nui chi maramigwane mu mendaig kømøtø, nøashib srua yamig køn.

⁶Tiuswei wamwan kusrebig kørnrrai møikkøben ñun kusrenanøbigwane chigurrimbunø ñi tabig tøgagúítøga nun purugub pirisamig køn.

⁷Chigøben kømønrraitamab ñimguen ñimasitiø treeg isumøtay, Tiusbe nun maig købash inchib ka indzatø mørtraingucha kømøtø køn, kan mög nø maig ellmara kørømariibe katøburø trunundøwei tulishinrrun. ⁸Kaguende ñim asrwan tab kørnrrai ellmarøb pønrraibe, truikkugurrimbe trømbøig marig utønrrun. Inchen Espíritu Santon tab kørnrrai ellmarøb pønrraibe, truikkurrimbe managatig øsig kømigwan uta tøgagømig kørnrrun. ⁹Tabig maramigwane muraaramø marøbig marøb meløgun. Kaguende tru treeg marigwan utamig yandø pubene, treeg marigwan utamig kørnrrun, nam kullaaramø marøb meløwabe. ¹⁰Inchawei treeg købene, chigøben maramdiig købenbatø, mayeelanba tabig margin. Inchen mas Tiuswei misag, tru isubigwan Cristoinug pasra tøgarmerane katøguchinguen tabig maramig køn.

Mandø kømigwan Pablo srabe wamindiilø

¹¹ ¡Au, ñimguen asay! Nabe nai taska ñimuyasig øyeeg nørriig pørar. ¹²Møiløgøben truba tabig marøbelø kønmab asiilø kørnrrab inchibeløbe, ñimune asru circuncidamne inchibelø køn, Cristo kurusu kwaigwan waminchen, kaig martrab wendautø llirailø kømønrrab. ¹³Pøs tru circuncidawar købenguen, tru maig maramigwan martrai pørig maig karuben trunun marmelø købendørre inchibelø køn. Inchendø nømbe ñimune asrwan circuncidanrrai indan, nømbe ñimui asru truba tab kui mørøb, ka mög inchib pønrramig kørnrraindø. ¹⁴Pøs naimburapte namui Señor Jesucristo kurusu kwaigweimburab kømubene, managuen katøgan chi pegube, mög inchib pasramig pumuimbe kótan. Jesucristo kurusu kwaikkurri naimburapte yu pirauibe yandø kwai lataig

patsig køben, katø nagurri piraugweimburaappe kwawa lataitøwei patsig kur. ¹⁵Asru circuncidaweig kui chi kørnrrab kømøwei, circuncidamíig kui chi kørnrrab kømøwein køn, treeg kømøtø, kerrigu srøig peemay amønamig truibeguende tabig købwei indan. ¹⁶Tru iig maig karuigwan treeg amøñibelane tru chi isumgaig tab købiiba, lastima asiiba, nømuim pala kørnrai inchar; katø tru cierton mayeelø Tiuswei israelitasmeraim palagucha.

¹⁷Møingurrimbunøbe mugucha nan chinetø pui pasramig kørnrai marmørrunrrigay. Kaguende nabe nai asru Jesucristogurri kaig indinab kørriindiilan nai asru asamdiig tøga pasrar.

¹⁸Namui Señor Jesucristoi ka yandø tab indiibe, nai nunelø, ñimba pasrønrraimab isur. Treeg kørnrun.